

AKASHVANI AIZAWL

REGIONAL NEWS BULLETIN

HEADLINES (MORNING)

1. Sawhthing thar leh ching tam ber Champhai district-ah a bul tan nan sawhthing sawngbawl hna kalpui tum a ni tih Horticulture Minister Pu C. Lalsawivungan a sawi.
2. Vikshit Bharat Young Leaders Dialogue 2026 chu vawiin New Delhi-a tan turah Mizoram state aiawh thalai 14 an tel.
3. Prime Minister Narendra Modia chuan India in AI model danglam bik khawvel hmuha a siamchhuah a tul a ti.
4. Union Road transport and Highways Minister Nitin Gadkari chuan lirtheia chesualte inenkawlina senso cashless-a tumsakna tur Prime minister Narendra Modia'n a tlangzarh thuai dawn a ti



MIZO GINGER USP

Sawhthing thar leh ching tam ber Champhai district-ah a bul tan nan sawhthing sawngbawl hna kalpui tum a ni tih Horticulture Minister Pu C. Lalsawivungan a sawi.

He thu hi nimina Horticulture Department buatsaih, Mizoramin sawhthing a tharchhuah hralh kawnga mi a hip bik theihna tur, DoNER hnuaiia Unique Selling Proposition chungchanga inrawnkhawmna MINECO Conference Hall a neihah sawiin Horticulture Minister chuan DoNER Minister pawhin sawhthing chungchang chu a phur pui thu leh a hring ringawt ni lova a rova hralh a nih a, man man zawka hralh a nih theih nan leh tawih ral mai mai a tlem zawk nan hmalak ni se a ti a, Mizoram sawhthing chu USP atana state sawrkarin a thlan angin DoNER pawhin a pawmpui thu a sawi a. Horticulture Department leh Planning Department hnuaiia PIME Unit tangkawpin Ministry of DoNER-ah DPR an theh luh tawh bakah cheng vbc 35 hmuh an inbeisei tih a sawi a ni.

Pu C. Lalsawivunga chuan Sawhthing thar leh ching tam ber Champhai district-ah a bul tan nan sawhthing sawngbawl hna kalpui tum a ni tih sawiin, a hmunpui chu Mualkawi a awm tura duan a ni a ti a, Zotlang, Vaphai leh Muallchengah a sawngbawl hmun dang din tum a nih thu a sawi a. Ram ti chhe tlem zawka chin a nih theih nan department chuan Sustainable Ginger Cultivation Programme a duang tih sawi bawkin Mizo sawhthing that bikna hriain NITI Aayog chuan Mizoram chu Ginger Capital of India-ah a puang a, ‘sawhthing chin, thar leh sawngbawl chu thalaite leh a tui mite tan eizawna tha tak a ni thei dawn a ni’, a ti bawk.

Agriculture Minister Pu P.C. Vanlalruata chuan state dangte aia Mizoram sawhthing that bikna-te chawilar thiam a nih chuan sawhthing lei leh hralh kawngah pawh nasa zawka ram economy tan hlawkna a thlen ngei a beisei thu a sawi. Sawhthing sawngbawl dan chi hrang hrangte chu ngaih pawimawh a nih thu sawiin Marketing board hnuaiiah zirchiangtu tur Research Team din a nih thu te, ram leilung ti chhe lo tur zawng leh tha zawk leh hlawk zawka thar dante zir zel a ni a ti.

(CORR)



CM

Chief Minister Pu Lalduhawma chuan Pang zirlaite tan Aizawl Ainawn vengah Pang Hostel sak a ni ang, a ti.

He thu hi nimina Vathuampui khelmual a Pang Zirlai Pawl huaihawt, Pang hnam Kut ropui ber leh ngaihhlut hlauh ber pakhat, Nau Lawm Kut-Naumariamlak Kut a hmanpui naah Chief Minister chuan sawiin, zo hnahthlak hnam peng hrang hrangte zia leh tih dan chu a riralin theihngihl a hlauhawm thu a sawi a, thangtharte chu hnam ze tha tak tak te bakah tawng leh thu leh hlate a boral loh nan tha taka humhalh thiam turin a chah bawk.

Chief Minister chuan zirlai pawlte chu hnam peng hrang hrangte huikhawmtu tha tak an nih thu a sawi a, Pangfate huikhawmtu atan pawh Pang Zirlai Pawl tluka chak leh huapzo an awm loh thu a sawi bawk.

Pu Lalduhoma chuan Pang hnam chu Mizo hnam zinga thlang tla hmasa pawl an nih a rinawm tih sawiin, hnam lian tak ni mahse an hnam chanchin chhiar tur a tam loh thu leh, hei hi thangthar fng zawkte chuanrawn vei a, hnam chanchin ziaka dah uar tura fuihin, Mizo hnam tobul chhui chian chu sorkar chuan tha a tih thu leh, hemi kawngah hian hmalak mek a nih thu te, Mipui nawlpui pawm tlan theih history rintlak chhuina kawngah pawh Pang history chuan dinhmun pawimawh tak a luah hial a a rin thu a sawi bawk.

Naumariamlak Kut a hmanpui naah hian Chief Minister chuan Mizoram chhim lam bial chu engtikah emaw chuan Mizoram kawtchhuah a nih tur thu a sawi a, Ministry of DoNER hnuiaia High Level Task Force on Northeast Economic Corridor-a Chairman a nih thu te, India hmarchhak ramten an hlawkpui theih inkalpawhna kawngpui tha neih theih dan tur an sawiho thin bakah KMMTTP chu Mizote chauh ni lovin Mizoram thenawm state te pawhin an nghahhlelh em em thu leh puitling thuai thuai se an duh thu a sawi.

(Lalhrualtuanga PTC Aizawl)

<><><>

VIKSIT BHARAT

Ram pum huap ni li aw h tur Vikshit Bharat Young Leaders Dialogue 2026 chu vawin hian New Delhi-a Bharat Mandapam-ah tan a ni ang.

Union Youth Affairs and Sports Minister Dr. Mansukh Mandaviya chuan, Vikshit Bharat chu India hmalam hun atana thil pawimawh tak a nih thu sawiin, Prime Minister pawhin a ngai pawimawh hle a ti a. Union Minister chuan Vikshit Bharat chu nikum atanga tan a nih tawh thu sawiin hei hian thalai ram tana rilru seng te inphochhuahna hun tha a siam mai bakah, ram tan a thil tangkai tak a nih thu a sawi bawk.

Puan tawh angin, Mizoram aiawha Vikshit Bharat Young Leaders Dialogue 2026 a tel tur thalai 14 te chu ni 5, thawhtanni khan Larsap General VK Singh chuan Aizawl Lok Bhavan Durbar Hall-ah kawmin duhsakna nen a lo thlah tawh a, he hunah hian Larsap chuan, Mizoram aiawh turte chu an chanvo tur leh inpuahchahnate sawipuiin, Mizoram aiawh a kal tur te pawhin sawrkarin hetiang ang hun remchang a siam sak avang leh, Larsap-in an puala inkawmhona hun a buatsaih avanga lawmthu sawiin, Mizoram tana hlawhtlinna chang tura theihtawp chhuah an tum thu Larsap hi an hrihl a ni.

(Lalhrualtuanga PTC Aizawl)

<><><>

UD&PA MINISTER

UD&PA Minister Pu K. Sapdanga chuan Mizoram District khawpui hrang hrang a Storm Drain tui luankawr siam hna kalpui mek chu fir takin sawrkarin a en zui reng a ti.

He thu hi nimina UD&PA hnuiaia Storm Drain tui luan kawr siam bakah UD&PA hnuiaia hna hrang hrang khuh-hawanna hun, Planning and Programme Implementation Department Conference Hall Aizawl a neih-ah sawiin Pu K. Sapdanga chuan khawpui hmasawanna hna ni satliah lo khuarel chhiatna thlen thei laka khawpui chhanhimna tura inbuatsaihna hun an hmang thei chu lawmawm a tih thu a sawi a, hmasawanna hna zingah Aizawl khawpui-in a mamawh hmasa ber chu tui luan kawr tha neih a ni tiin, he hmalakna hian khuarel chhiatna hrang hrang Mizoram in a a lo tawh thin leh hriselna kawngah hmasawanna nasa tak a neih tir theih thu a tarlang tel bawk.

Storm Drain tui luan kawr siam hmalakna chungchanga kal khawmte a bik takin Contractor te chu sum siamna a-nih loh-thu leh chhanhimna hna an thawh zawk thu sawiin, an hnathawh-te tha taka thawt turin a ngen tel bawk. Storm Drain tui luan kawr siam hmalakna-ah hian veng-tin Local Council te chu sawrkar thawhpui turin Minister hian a sawm nghal bawk a ni.

(Lalhrualtuanga Aizawl PTC)

<><><>

LAWNGTLAI

Lawngtlai Bawrhsap thahnemngaihna vanga Lawngtlai khawpuiin kawng hrang hranga hma a sawn theih nan, khawpui chhunga Veng 12 te tana inelna buatsaih, Bawrhsap Award vangin Lawngtlai khawpui hmel a danglam chho tan tih Lawngtlaia kan corr chuan a sawi.

VC

Kumtina chhonzawm tura Lawngtlai Bawrsap Pu Donny Lalruatsanga ruahmannaa siam Bawrsap Award bultanna hi kum kalta November atang khan hmalak tan a ni a, Lawngtlai khawpuia Veng 12 ten an huamchhung ah faina beihpui thlakin, kawngpui kam leh Tuihawk luankawr te an thianfai a, veng mipuite hnen ah Vantlang Tlangau kaltlangin, mahni In leh a vel vawngfaia, awmzenei zawka an lirthei leh hmanrua te dah turin an ngen bawk.

Bawrsap Award hian Veng fai leh inenkawlna tha, Ran khuahkhirh leh Lirhei dahdan mumal te, nunphung tha inzirtirna leh midang tana hnawksak lo, zahawmtaka nunhona vawngtha te chu ngaihpaawimawh hmasak a ni dawn a, kumtinin Republic Day ah Award hi hlan thin tura ruahman niin lawmman thatawktak siam a ni dawn.

Bawrsap Award- dawngtu tur endik turin Mizoram Journalist Association (MJA) Lawngtlai District ruat an ni a, an ni hian thlatinin Veng hrang hranga hmalakna endikin, tun dinhmun ah Lawngtlai khawpui hmel a danglam chhoh mek thu MJA hruaitute chuan an sawi.

(Lalnggheta Ralte Lawngtlai PTC)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

LOK AYUKTA REPORT

Mizoram Lokayukta Sixth Annual Report 2024-2025 chu nimin khan Mizoram Lok Ayukta Chairperson Pu Lalmalsawman Larsap Gen (Retd) Vijay Kumar Singh hnenah a hlan a. Annual report hian April ni 1, 2024 leh March ni 31, 2025 inkar a huam a, Mizoram Legislative Assembly thutkhawmah pharh a ni ang.

He hunah hian Mizoram Lokayukta Chairperson Pu Lalmalsawma chuan Mizoram Lokayukta hnuai case neih dan leh bawhzui dante bakah dinhmun leh thlen chinte Larsap hi a hrih a. Larsap chuan an hmalaknate fakawm tiin, tun aia nasa zawka tan laa theitawp chhuah chhonzawm zel turin a chah a ni.

Pu Lalmalsawma hi Lok Ayukta member 2- Pu Lalsanglura, leh Pu Joel Joseph Denga ten an tawiam a ni.

Mizoram Lokayukta Sixth Annual report-in a tarlan dan chuan kum 2024-2025 chung khan Mizoram Lokayukta hnuai eiruk thubuai 20 ziahluh niin heng zinga 6 te hi preliminary inquiry tura thawn a ni a. Hemi hun chung vek hian preliminary inquiry report 8 dawn a ni a, thubuai 5 chinfel niin, thubuai 1 ah mi 2 te thiam loh chantir an ni.

March 2019 a Mizoram Lokayukta din a nih atanga vawiin thleng hian Mizoram Lokayukta hnuai eiruk thubuai 91 ziahluh tawh a ni a. Thubuai 58 chinfel tawh niin, preliminary inquiry leh investigation kalpui mek 33 a awm bawk.

Eiruk thubuai hi engtik lai pawhin a thlawn vekin Mizoram Lokayukta Office MINECO-ah lehkha pheka ziakin emaw, email - Mizoram.lokayukta@mizoram.gov.in ah thlen theih a ni a. Mahni nihna tilang duh lote chu an nihna thup sak thin a ni a, amaherawhchu Lokayukta lam atanga biakpawh theihna tur erawh dah tur a ni.

(DIPR)

<><><>

PM ON AI

Prime Minister Narendra Modia chuan India in AI model danglam bik khawvel hmuha a siamchhuah a tul a ti. Nimina India AI-Starts-Up roundtable a kaihrainaah he thu hi sawiin Pu Modia chuan India thilsiam Made in India leh khawvel tana siamchhuah hmalakna Made for the World tarlang thei tur AI Model siam a ngai a ti a. India kutchhuak AI siamchhuah anih hunah chuan tihdan kalphung dik, langtlang, leh mimal thuruk vawnhimna lama tha tak siam a ngai a ni a ti bawk.

(NewsonAIR)

<><><>

UNION ROAD TRANSPORT MINISTER

Union Road transport and Highways Minister Nitin Gadkari chuan lirtheia chesualte inenkawlina senso cashless-a tumsakna tur Prime minister Narendra Modia'n a tlangzarh thuai dawn a ti. Nimina State leh UT Transport Minister Meeting vawi 43-naah he thu hi sawiin Pu Gadkari chuan he scheme hnuai hian lirtheia chetsualna tuartute chuan a thlawna inenkawlina a reilo berah ni sarh chhungin cheng nuai 1 leh sing 5 thlang an hmang thei dawn a ti a. Hei bakah hian lirthei chetsualna a thlena hliam tuar damdawiina hruaitu te hnenah cheng sing 2 leh sang 5 lawmman pek thin a ni ang a ti a. He scheme hi pilot project angina Uttar Pradesh, Haryana, Punjab leh Chandigarh ah te hlawhtling taka enchhin a ni tawh tih Union Minister chuan a sawi bawk a ni.

(NewsonAIR)

<><><>